



Club da Skiunzs Zuoz

Protocol da la radunanza generela dals

6 december 2024 a las 20h, Sur En, Zuoz

Preschaints: 19 commembers e commembras e la suprastanza cun 5 persunas. In tuot 24 persunas.

S-chüsos: 14 commembers s'haun s-chüsos.

- Tractandas:**
1. Bivgnaint
 2. Protocol da la radunanza generela dals 08.12.2023 (vair pagina d'internet CdS Zuoz)
 3. Rapports: President
Schef cuorsas e materiel
Schef giuvenils
 4. Müdamaints
 5. Quint annuel 2023/2024
 6. Rapport dals revisuors e dis-charg a la suprastanza
 7. Onorificaziuns
 8. Program annuel 2023/2024
 9. Varia

1. Bivgnaint

Il president Thomas Pinchera salüda a 24 commembras e commembers. A sun entredas diversas s-chüsas chi nu vegnan però elettas.

La bannida es gnida tramissa a temp ütil cullas tractandas. A nu do ünguotta dad agiundscher.

Scu scrutinadur vegnan proponieus Hans Lozza e Dorette Haller. Els vegnan elets ed acceptos sainza cuntravuschs da la radunanza.

Displaschaivelmaing es eir quist an da piglier cumgio dad ün commember, nempe da Geben Gilli e Ludwig Denoth. Nus fains ün minut da silenzi.

2. Protocol da la radunanza generela dals 08 december 2023

Il protocol da la radunanza generela dals 8 december 2023 as ho pudieu leger sülla pagina d'internet dal CdS Zuoz e vain approuvo unanimamaing da la radunanza. Il president ingrazcha a l'actuara Corinna Badilatti Steger per la cumpiliaziun.

3. Rapports

Rapport anuel 2023/2024 dal president Thomas Pinchera:

Thömi prelegia sieu rapport:

Stimedas comembras

Stimos comembers

Il sguard inavous sülla stagiun 2023 – 2024 am fo grand plaschair na be sch'eau pens vi da las relaziuns da naiv chi d'eiran vairamaing bunas già a partir da principi december fin l'afin da marz. Ma eir ils evenimaints chi haun gieu lö vainsa pudieu mner tres cun bunas relaziuns e nummerusa partecipaziun da nossas commembras e da noss commembers.

La suprastanza as ho chatteda l'an da gestiun passo per 4 radunanzas da suprastanza e duos radunanzas a regard Maraton da Skis Engiadinais.

Las activiteds d'inviern haun cumanzo cun la saireda d'infurmaziun obligatorica pels genituors dals iffaunts da l'JO. Quista saireda ho il böt d'infurmer ils genituors che cha noss club fo, scu cha nus ans finanzchains e per spiegher ün u l'oter reglamaint cha nus avains stuvieu metter sü per giaccas e commembranzas generelas da l'JO. Cuort zieva avains alura surdo als iffaunts las manduras da skis e passlung, que chi'd es adüna darcho ün "Highlight" per me da vzair ils öglis glüschaints dals giuvenils cur chi clappan in maun lur giaccas e chotschas.

Cul Marcho da Nadel aint il minz da Zuoz ho eir cumanzo la part da cumpagnia da noss evenimaints. Eir quist an vainsa fat ün bel guadagn cun vender maruns (brassos da Thomas e Barbara Fent), vin chod e punsch per iffaunts.

Sur las gruppas da Whatsapp vainsa organiso eir la prüma gita da cler glüna inua ch'essans chaminos sün tar Cudo sün Alp Grietschouls a manger Fondue. Eir quistas gittas sun per me adüna darcho bellischems evenimaints da cumpagnia, inpustüt scha las relaziuns da naiv sun uschè bellas scu l'an passo.

Sur las gruppas da Whatsapp vainsa organiso auncha ün u l'oter evenimaint dapü scu per exaimpel fer passlung da Surlej a Zuoz u skiadas in cumpagnia in noss bellischem territori da skis.

L'Engadin Ski Cup chi ho gieu lö ils 14 schner 2024 avains eir quist an darcho organiso insembel cun las scoula da skis "Speciale" e "Giorgio Rocca". Scu eir gia l'an passo vainsa nus dal Club da Skiunzs Zuoz preparo in sanda aunz la cuorsa tuot l'infrastructura per pigler il temp e monto diversas raits da sgürezza. La cuorsa sves haun alura mno tres ils duos clubs partenaris. Grazcha la buna collavuraziun cul persunel dals runels e la stupenda preparaziun da la pista d'eira que üna cuorsa fich allegraivla.

Cun La Diagonela in sanda ils 20 schner 2024 e La Sfida in dumengia vainsa pudieu sustegner ils organisaturs cun divers voluntaris our dal ravuogl dal Club da Skiunzs Zuoz.

Ils 27 schner 2024 d'eira sül program il di da skis da las veteranas e dals veterans. La mort da noss comember Ludwig Denoth be cuort aunz quist di tradiziunel ho bütto üna sumbriva sün quist di sulagliv. Eau pens cha que d'eira güst da mner tres quist di in memoria a noss cher Ludi.

Il Maraton da Skis Engiadinais ho gieu lö ils 10 marz 2024. Per me e per bgers oters pü cu facil il maraton cun las pü bgeras sfidas e sgürischem ün di chi restaro auncha lönch in memoria. Già ils preparativs d'eiran tuot oters scu normel e que na be perche cha Urs Krummenacher ho surpiglio la bachetta dal « chef cuschinunz » da Fredy Sigg ma tres la previsiun da l'ora fich noscha cun naiv, plövgia e vent. Il fat cha la partenza ho stuvieu gnir spusteda da Malögia a Segl e zieva dafatta a Silvaplauna demuossaiva già cha quist nu do ün maraton dal tuot normel. Eir nus da la suprastanza insembel cun Urs e Fredi vainsa stuvieu disponer intuorn a fich cuorta vista complettamaing nos concept da grills e mangiativas. Grazcha ad üna granda flexibilited eir da la vart da la FLAB vainsa rumieu in venderdi ün plaun inter da la « Halla 3 » per avoir dapü plazzas a chod e pudair spuster noss grill almain parcielmaing suot tet.

Que chi d'es alura capito il di da la cuorsa ho surpasso tuot las aspettativas. L'ora d'eira auncha bger pü miserabla scu previsa e quels purtretts da curriduras e curridurs dschiets tres e tres nu schmancharo mê pü in mia vita. Grazcha noss preparativs ed ün grandischem ingaschamaint da tuot ils voluntaris, da la defaisa civila ed impustüt da mias collegas suprastantas e suprastants insembel cun Urs e Fredi vainsa pudieu fer il melder our da la situaziun ed impedir il « chaos complet ».

Tres que cha la sela da festa e nos local da chod sun gnies druvos dapü scu sela d'aspet e na propcha scu lö da consumer as inclega que da se cha que nu d'eira ün an da record che chi riguarda il schmerdsch.

In quist'occasiun ün grand grazcha fich a tuot ils agüdaunts per quist effort grandius ed exemplaric.

Nossas maestraunzas e cun que il punct culminant da la stagiun impustüt per noss giuvenils haun gieu lö ils 15 e 16 marz 2024. Scu üsito vaivans cumanzo in venderdi saira cullas cuorsas da passlung giò'n Resgia. Las categorias dals iffaunts sun scu adüna bain frequentedas, quellas dals creschieus invezza haun auncha ajer vers insü.

In sanda ils 16 marz 2024 ho gieu lö il slalom gigantesc sülla pista da cuorsa da Pizzet. Eir quista part da la maestraunza d'eira fich intressanta e scu adüna ün bel evenimaint per giuven e vegl.

La finischiun cun tuot las rangaziuns e l'ingrazchamaint a tuot ils mneders da l'JO ho gieu lö i'l restorant Sur En.

La gita Risotto chi ho gieu lö ils 29 marz 2024 cun cundiziuns fenomenelas d'eira üna bellischma finischiun da la stagiun d'inviern. La prüma gruppa ho inchamino la via vers il Piz Arpiglia ed ho giodieu zieva üna bella skiada giò pel fil vers l'Alp. La seguonda gruppa cun noss cuschinunzs Fredi ed Iris sun chaminos directamaing sün l'Alp. Cun que cha la secziun Bernina dal club alpin svizzer vaiva il listess di üna gita sün Arpiglia vainsa pudieu bivgnanter divers giasts vi da maisa cun manger il risotto. Grazcha fich a Fredi ed Iris pel cuschiner ed impustüt per quella padella risotto sainza tschiguollas.

L'JO suot la bachetta d'Andrina Planta es inpusüt üna JO da sport da naiv. Per cha noss iffaunts sun pronts per l'inviern vainsa organiso quatter dis d'evenimaints già d'utuon. Traunter oter sun els ieus sü Silvaplauna a fer sagls aint il Park da "Freestyle" da sted. Per cha ün u l'oter vain forza listess ün champiun da passlung u skis alpin as haun ils iffaunts partecipos vi da diversas cuorsas in tuot las duos spartas. Uschè traunter oter a las cuorsas da not a Puntraschigna u a cuorsas da passlung aint il "Skillspark" a San Murezzan.

Noss giuvenils chi haun fat il pass da l'JO aint il sport da prestaziun sun aint illa sparta skis alpin: Annina Casty (RLZ), Ladina Malär (Cds Suvretta) e Fadri Malär (Cds Suvretta) e Ladina Malär (Cds Suvretta). Aint illa sparta passlung e biathlon: Felici, Burtel e Gisep Defila, Risch Cadonau e Corsin Pinchera. Eir Freestylers sun naschieus our da noss Club e que füssan Armando Steger e Livio Derungs. Tuot quists giuvens athlets procuran buns resultats sün nivel naziunel ed internaziunel ed haun fat ils prüms meters sülla naiv aint il ravuogl dal Club da Skiunzs Zuoz.

Per glivrer nu vuless eau manchanter da m'ingrazcher tar tuot las mnedras e mneders da l'JO, tar tuot quels chi s'ingaschan scu voluntaris tar noss evenimaints ed impustüt tar mias collegas da supranstanz chi faun üna granda lavur e sacrifican diversas uras dal temp liber pel Club da Skiunzs.

Cun que as giavüsch eau ün bellischem inviern e bells dis da Festa.

Grazcha fich per l'attenziun.

Rapport dal schef giuvenils 2023/2024 Andrina Planta (prelet da Corinna Badilatti Steger):

Rapport dal schef giuvenils 2023/2024 Andrina Planta

Ün seguond an scu chefa da l'JO Zuoz es passo – que d'eira ün an plain bels mumaints.

Nus vains cumanzo la stagiun cun üna saireda da genituors in november 2023. Que d'eira üna bun' occasiun per infurmer sur dal club, sur da nos program e da las gruppas da whatsapp, nos reglemaints ed il pü important, per baderler cun oters.

Nus vains pudieu piglier incunter 51 annunzchas. Culs 9 da la scoulina gninsa sün ün totel da 60 iffaunts. La stagiun aunz haun participo 58 iffaunts a l'JO Zuoz.

Da quels 60 haun fat 19 iffaunts tuottas duos disciplinas, 28 be alpin, 4 be passlung, e 9 haun piglio part a l'JO scoulina - üna granda gruppa chi'd es gnida tiers quista stagiun al JO per ils grands.

JO passlung

La stagiun ho cumanzo il 6 december, suot la bachetta dad Arina Steiner. Insembel cun Tamara Heregger e cun las duos Corin(n)as, haun las mnedras dal JO passlung haun fait üna lavur straordinaria culs iffaunts – els haun pudieu surpilgier l'ierta dad Andri Marugg ed ils iffaunts haun giodieu ün grandius temp.

Il focus scu eir già ils ultims ans es il plaschair vi dal muvimaint e dad amegldrer la tecnica. Ils “highlights” per ün pêr iffaunts sun stos duos cuorsas. In schner es steda La Diagonela. Cun que cha'l böt es immez Zuoz, vainsa pudieu motiver a 4 iffaunts da's participar a La Cuorta. Tuots 4 sun rivos zieva 6km stracs ma cuntaints aint il böt. In favrer haun 5 iffaunts participo tar il Alpina Langlauf Pokal a San Murezzan.

La finischiun da l'JO passlung es steda la cuorsa dal club, chi ho gieu lö in venderdi saira il 15 marz. Per tuots ün grand plaschair!

Nus dschains grazcha ad Arina, Tamara, Corina e Corinna, per lur ingaschamaint!

JO Alpin

Il trenamaint alpin ho cumanzo eir quist an sü Marguns il 2 december e la prüma vouta a Zuoz il 23 december.

Eir quist an vains pudieu giodair las sandas culs magisters da skis, cun trenamaints varios sün pista e, cun bger entusiassem, eir sper la pista. Cun iffaunts pü ambiziunos essans ieus trais voutas a la cuorsa da not a Puntraschna. Allegraivelmaing as haun partecipos a quellas cuorsas ca.20 iffaunts. Ün da nos iffaunts ho guadagno la cumpetiziun dal Zuoz Rocks in favrer. Clelia Cadonau es dvanteda regina da Zuoz. Eir quist an vainsa pudieu passer üna stagiun sainza grands accidaints.

La finischiun da l'JO alpin es steda la cuorsa dal club il 16 marz.

Ingrazcher vulessi in quist'occasiun a Gudi ed a sia squedra da magistras e magisters da skis, chi sun tar minch'ora tiers cun bger plaschair ed engaschamaint.

JO scoulina

Noss pü pitschens commembers dal club, que sun ils grands da la scoulina, sun adüna stos in marculti zievamezdi sün pista.

Vera Pagani es steda per la prüma vouta la mnedra da quista gruppa cul sustegn da Anna Pagani e da Madlaina Schwarz. Ils zievamezdis da skis cumainzan tar els in schner e vaun alura fin in marz tar la

cuorsa da club. Tar quist evenimaint da finischiun sun eir ils pû pitschens da la partida. Que fo impreschiun cun che tempo cha'ls pû pitschens passan tres las portas da la stipa pista dal Pizzet. Grazcha fich Vera, Anna e Madlaina per vos temp ed igaschamaint pels pû pitschens.

Eau vuless aunch'ingrazcher a tuot quels e quellas chi haun sustgnieu il Club.

La stagiun 2024/2025 ho già cumanzo cun bgers iffaunts motivos – cun ün totel da 69 iffaunts. Ün record chi'ns fo fich grand plaschair!

Grazcha fich per vos interess ed eau am s-chüs per mia assenza quista saira. Eau m'allegro da vzair vus tuots sülla pista e loipa quist inviern.

Rapport schef cuorsas e materiel 2022/2023 Gian Malär:

Gian Malär prelegia sieu rapport, la prüma part in tudas-ch:

Materiel:

Nus vains cumpro 13 novas giaccas da skis pitschnas, in prüma lingia pels iffaunts da scoulina. Ellas sun ün pô otras ed haun sü bè il logo, üngüns sponsurs.

Uschè vainsa pudieu der our tuot las otras giaccas als iffaunts da scoula chi vaun ad JO e tuots haun pü u main survgnieu la güsta grandezza.

In generel es il materiel in ün bun stedi e po gnir druvo eir quista stagiun sainza problems.

Il report annuels vegnan acceptos unanimamaing.

4. Müdamaints

Düraunt l'an da gestiun ho que do divers müdamaints.

5. Quint annuel 2023/2024

La chaschiera Karin Casty preschainta cuort il rendaquint finel e'l bilauntsch.

(Vair rendaquint e bilauntsch detaglio separo tar Karin Casty.)

Il rendaquint vain accepto unanimamaing sainza cuntervuschs.

6. Rapport dals revisuors

Karin prelegia il rapport dals revisuors. Ils revisuors propuonan a la radunanza da der dis-charg a la suprastanza.

Il rapport vain accepto e la radunanza do dis-charg a la suprastanza.

Nos president Thomas Pinchera ingrazcha als revisuors Niculin Arquint e Ramun Ratti per lur lavur.

7. Tschernas

Nus nu vains üngüinas novas tschernas.

8. Onorificaziuns

Onorificaziuns da la vart da Swiss Ski: Commembers daspö 1984 Claudio Filli, Riet Campell, daspö il 1974 es Toni Schlumpf.

9. Program annuel 2023/2024

Thomas Pinchera muossa il program annuel (vair homepage), chi'd es dvanto ün pô pü stret. Aint il program annuel sun aint ils puncts fix. Nus vains ün program vario i'l ram scu eir ils ultims ans. Nouv as po s'annunzcher directamaing sur la homepage e per las gruppas da whatsapp chi spordschan diversas activiteds.

10. Varia

Nus vains müdo duos reglamaints (vair reglamaints a regard iffaunts chi faun sport da skis da prestaziun e reglamaint da sponsoring).

Üngün'oter nun ho oters puncts.

La radunanza vain serreda a las 20.37h.

In buna fé

L'actuara

Zuoz, december 2024

Corinna Badilatti Steger